

Portas svizras vers il mund

Discussiun al podium ils 4 da november

DA GUIU SOBIELA-CAANITZ

■ **Ina porta svizra vers il mund? Ma cler, quai è Geneva, e quai dapi Jehan Calvin (1509-1564) numnà Jean Calvin. Geneva è la Roma protestanta, la chapitala dal cristianissem reformà.** En il 19avel tschientaner sa sviluppa in moviment caritativ che sa deditgescha oravant tut a las unfrendas da guerras e s'exprima cun l'organisaziun da la Crusch cotschna, reconuschida da la cuminanza internaziunala. Suenter l'Emprima Guerra mundiala vegn Geneva la sedia da la Societad da las nazions (SDN), sustegnida da Svizzers prominents sco l'anteriur cuss. fed. rumantsch Felix Calonder (1863-1952). Lez era activ sin il stglim global, cun far da mediatur a favur da las minoritads en Silesia, e sin il local, cun promover il rumantsch en sia vischnanca paterna da Trin. Suenter la Segunda Guerra mundiala ha l'ONU sur-

piaglià l'ierta genevrina da la SDN. Oz dumbra Geneva 30 organisaziuns internaziunalas, 250 uniuns privatas (ONG) e 173 represchentaziuns internaziunalas; quai ha chattà ora «foraus», forum da politica exteriura (lea.suter@foraus.ch; telefon 022 908 44 56).

Genevra e Basilea rivaliseschan

Ma la citad da cunfin sper il Rodan ha survegnì concorrenza sper il Rain. Quai ha entschavì 1646-1648 a Münster ed Osnabrück en Vestfalia, cur che l'inschignus diplomat Johann Rudolf Wettstein (1594-1666), burgamester da Basilea, ha cuntanschi l'indipendenza da la Svizra. Il 1946, 300 onns pli tard, suenter tractativas cun la Frantscha, han ins inaugurà l'eroport da Basilea-Mulhouse sin l'intschess da la vischnanca da Blotzheim (Alsazia). Dapi lura vegn el adina puspè schlargià; uss ha'l num «EuroAirport Basel Mulhouse Freiburg [Brisgo-

via]». 1963 han ins fundà l'uniun «Regio Basiliensis» per metter ad ir la cooperaziun sur ils cunfins. I vala la paina da cumparegliar lezza cooperaziun a Basilea ed a Geneva. Quai fa «foraus» mardi, ils 4 da november, davent da las 18.30 a Basilea, cun ina discussiun publica al podium en la chasa municipale da la vischnanca burgaisa, Stadthausgasse 13, tranter:

- *Manuel Friesecke*, manader da la «Regio Basiliensis»;
- *Yannick Roulin*, schef da secziun tar il Departament federal d'affars exteriurs;
- *Anna-Karina Kolb*, manadra da la Partiziun per relaziuns exteriuras da la republica e chantun da Geneva;
- La moderatura bilingua *Madeleine Oesch*, istorica, manadra da l'Institut europeic da l'Universitad da Basilea (europa@unibas.ch).

Annunzias: www.foraus.ch/basel-genf.